

廣文書局印行

小方壺齋

輿地叢鈔

(四一)

內政部出版業登記證內警台業字第伍肆玖號



滇南通考

昆明王忠訓著

滇南形勢左繞金沙右界瀾路重關複嶺鳥道羊腸而雲南一府山盤水曲較諸郡稍平衍實足以控馭兩迤東以曲靖爲門戶西以楚雄爲屏翰激江衛其南武定障其北大理居迤西之中與雲南相策應至元臨開化接壤交趾永順外臨緬甸鶴永近連吐番此數郡者實資鎖鑰而雲南大理永昌尤號沃野此形勢之大略也昔人謂雲南有三要害東南界交趾老撾諸夷以元臨爲鎖鑰西南界緬甸諸夷以永順騰越爲咽喉西北界吐番以麗江永甯北勝爲扼塞此三要也門戶有四一曰古路自印雅建昌渡金沙入姚安白崖卽古路也又有東路西路間路此四路也西以永昌爲關以釐川爲蔽北以鶴慶爲關以麗江爲蔽南以元江爲關以車里爲蔽東以曲靖爲關以霑益爲蔽此四關之說也觀此可以知雲南矣至於地脈山川尤可殫述焉山原始於西藏枯爾坤兩江夾持至於老君山穹窿鬱崱爲通省眾山之祖又爲定西嶺爲碧藏山又東北爲岷嶠山及至霑曲遂由黔入粵入楚入閩以及浙江諸省其水則以金沙江爲北界此水原出吐番達喇喇麻東北牛吼山下東南流入喀木地經麗鶴永北武定東川入四川界合於岷江其入之者則有打冲河卽諸葛所渡瀘水也又有龍川江普渡發源於滇池周三百餘里源廣流狹有似倒流滇之名始此或又謂其迴環倒流故曰滇水之南匯者則有瀾滄江有二源俱出吐番喀木地會於又木多之南經麗江舊蘭州過雲龍經永順黑惠江入焉厯鎮沅普洱爲九龍江入於車里正西之大水則有潞江源出吐番哈拉臘兒入怒夷爲怒江入雲南保山大唐隘經雲龍過永昌入緬甸卽禹貢之黑水也按黑水有三而諸說紛紛水經注謂出張掖雞山此雍州之水與梁州絕不相涉漢書地理志唐樊綽皆以麗江爲黑水薛季宣又以瀘水爲黑水引酈道元之說以證之但與入於南海之說俱未合宋程大昌以瀾滄爲黑水明季李元陽因之山海經注亦然但皆未身經其地不過約指其爲某水

某水耳惟我○○○聖祖仁皇帝山川考詠釋三危之義以潞江爲黑水而後黑水西河惟雍州華陽黑水惟梁州有合於禹貢焉正東之大水惟八達河經粵西入於右江而禮社一江發源趙州至蒙化歷楚雄元江入於交趾斜界滇中此東西兩連之所由名也如大理之葉榆水卽古西洱河也又滇之極西有龍川江檳榔江俱入於緬明王驥征麓川兵抵金沙諸酋震恐曰自古漢人無至此者卽此也此地脈山川之大略也

滇南雜志

上海曹樹翹著

滇南地列坤隅得土沖氣省會之區地勢開闊四時協序氣候尤和環拱之嶽武楚姚諸郡無嚴寒溽暑大略相同兩迤迢隔寒熱各殊北鄙風高故麗江大寒有長年不消之雪南維地下故元江大熱有一歲兩穫之禾普洱鎮沅時有炎蒸瘴癘鶴慶永北亦多飛雪嚴霜至迤東之曲靖東川昭通較省會爲寒開化臨安廣南廣西較省會爲熱迤西之順甯蒙化景東則微熱雖有不齊非甚懸絕諺云四時多似夏一雨便成冬可因是以知其概云

蠻煙瘴雨自昔稱之諸葛武侯表但云五月渡瀘深入不毛并不言瘴大抵不毛之地山澤之氣不通夏秋積雨敗葉枯枝塵積而毒蟲出沒水際飲之輒痛脹又雨後烈日當空蒸氣鬱勃間有結爲五色形者觸之多病楊慎所謂交頭瘴九十月間潞江乾溝一帶露下於草草交相結此其證也霜降前後日田穀方割稻管冒煙謂之穀槎瘴最利害騰越分水嶺入西南卽盛夏亦清涼入東北至潞江卽嚴冬亦炎熱過州城入土境黃果樹塘下卽漸漸鬱蒸南干蓋隴五土司境無地無瘴惟戶撒臘撒氣候和平每隔一山一嶺卽日裘葛可更周髀經所謂南極左右冬有長青之草天生此種地方如此

瀾滄江每歲五六月中江中有物色如霜光如火聲如折木破石觸之則死或云瘴母交選謂之鬼彈內典謂之禁水凡近江邊界有之不獨瀾滄江爲然也

黑井風吹嶺北夾道桌麻花時氣候頗濃烈中人能作瘡名曰草瘡

雲南禹貢梁州之域有池周三百里源出邵甸南匯盤龍江西。螳螂川又經富民北去迴環倒流故名曰滇其地東至貴州西至金齒北抵蒙番南界交趾縱橫數千里爲府州二十有三山原起於西藏枯爾坤兩江夾持老君山穹隆鬱律爲通省眾山之祖惟永北一廳在金沙江外爲其左臂永昌順甯二

府在瀾滄江外爲其右臂老君東入鶴麗西分大理地據上游有建領之勢焉正脊中出爲定西嶺爲碧藏山折而北至羅次之玉龍山復折而南至昆陽之鐵鑪關又東北爲岷峽山又北爲邵甸折而西南爲隴山紆曲三疊旋轉如環乃建省治焉曰楚雄曰姚州曰武定西北之輔車也曰蒙景曰元江曰鎮普西南之藩籬也曰澂江曰臨安正南之屏蔽也曰廣南曰開化東北之保障也曰曲靖曰廣西全省之咽喉也曰昭通曰東川北門之鎖鑰也金沙江北折而歸西川瀾滄江南匯而入車里正東之水皆匯入八達河入廣西正西之水皆歸潞江入阿瓦而禮社一江發源趙州至蒙化歷楚雄而斜略其間故分爲東西兩池此則雲南之大較矣若夫霑曲一脈由黔入粵入楚入閩以及江浙諸省雖按籍可稽而在滇言滇未暇侈陳也

按滇數國其南爲昉町國其東爲夜郎國其西爲白子國又西爲哀牢國自莊王入滇以昆明爲滇王國仍故號與莊王爲與國相臣屬至漢武開滇滅夜郎與滇爲益州四郡而與白子國張樂進求玉印爲滇王在今白崖之間莊氏遂絕白子國其先阿育國卽釋經所謂西天佛國也皆以佛教蒙氏在蒙化亦以佛教而所祖爲祕密法與牟尼教微不同其後張氏袁蒙氏遂以其術興皆邪教也唐永徽四年蒙舍詔入朝開元二十六年請并六詔許之號南詔迤東爲莊王所臨風俗不甚信佛近楚池西張蒙二氏國事佛甚謹佛經所云金沙布地人安樂無虞卽今滇西及水邦孟良諸地也男女無別行同狗彘處西南極邊地多邪故蒙張皆以邪興浸淫千有餘年中國居者甚眾尙不能以盡變時以爲耻而中原之慕之者乃以爲迦瑜鄒魯豔而稱之不亦異乎滇起莊氏至張氏傳蒙氏鄭氏奪而有之楊干眞奪鄭段思平復奪楊以及於元入中國

從來言昆明者多指滇國不知滇國外更有所謂昆明也前後漢書皆云自桐師以東北至葉榆名爲嶺

昆明若以爲昆明卽滇國則滇王傳旣言武帝時平滇以其地爲益州郡何言後數年并昆明地皆以屬之乎考顏師古注寫鴛州也昆明在其西南崖浩注寫昆明二國名謂鴛及南昆明夷也鴛則明言鴛州也昆明亦未言卽今何地考一統志云昆明古西南夷之國名漢武通之改爲定筰縣屬越鴛郡晉因之齊屬獫狁後廢唐初置昆明縣屬鴛州後沒於南詔爲香城郡宋爲賀頭甸部屬大理國元初爲落蘭部至元中爲柏興府明改爲鹽井衛隸四川行都司按此則滇外別有一昆明在越鴛審矣由是知南詔傳所云昆明實吐蕃往來道綱目書韋舉破吐蕃圍昆明城及南蠻傳五代史所載之昆明者皆漢書之鴛昆明也概指昆明爲滇國何異刻舟求劍哉

益州今四川成都府諸葛武侯所謂益州疲敝者是也然漢武帝以滇王國置益州郡則今雲南至大理亦益州也漢志所謂分益州置永昌郡者是也今人知四川爲益而不知滇爲益者多矣

經言遵王之道遵王之路又云會其有極歸其有極是皆旅途之說也旅以人言途以地言我○國家大化翔洽無遠弗屆黔蜀粵三途郵亭館舍鱗次櫛比蓋不裏糧而數千里間如履戶庭昔之日鈴柝時傳今之日荏苒絕迹昔之日虎蛇雜出今之日雞犬相聞則履此途者可不知所感動哉黔與蜀商賈所經粵爲銅運通衢敢就見聞所及次第臚之出滇垣南門穿重關過歸化寺歌驪者於此折柳蓋如長安之灞陵道旁銅牛重數十斤有亭覆之昔之人鑄以制水至板橋四十里卽楊升庵賦詩處六十里楊林舊爲縣今廢入嵩明有蘭隱君止庵墓過海潮寺寺踞嵩秀湖上極爲幽靜東經關索嶺有武侯會盟臺七十里至易隆驛屬尋甸州九十里馬龍乃四窮州之一七十里交水卽霑益州城五十里白水屬南甯縣六十里平彝縣過清溪洞頗可遊觀出平彝縣二十五里爲滇黔分界有石虬亭至亦資孔七十里舊路由此經普安州至鎮甯鄂文端總制滇黔改由劉官屯以避斗郎箐之險上距亦資孔五十里俱屬普安

州四十里上寨驛三十里白沙過老鷹崖爲黔道首險軍興時鑿山開路四人與已可並行較之聞浙間已是坦途五十里阿都田俱屬安南縣過茅口渡亦稱西林渡瘴氣甚惡福文襄入滇時於此試礮演鎗瘴遂少減上拉邦坡山勢猙獰五十里郎岱安順同知分治苗亂後移協鎮於此六十里過石龍關至坡貢六十里鎮甯州過犀牛潭瀑泉三疊雷轟珠濺昔人謂勝廬山廬山瀉然河流由平地跌入深壑觀者從高望下殊覺悶悶六十里安順府貴州提督駐此略爲開障羣山皆拔地特起五十里安平縣六十里清鎮縣經龍場有陽明洞王伯安悟良知於此遂號陽明子至貴州省五十五里南門有甲秀樓鄂文端建煙窗水嶼頗踞一郡之勝五十里龍里縣過牟珠洞六十里貴定縣舊路由此走平越過張三丰禮斗崖鄂文端改由西陽楊老重安江共三驛屬平越縣凡一百一十里至清平縣清平至黃平州五十里經飛雲巖石乳懸結如夏雲叢起右卽月潭寺投鞭兀坐塵心俱靜五十里施康縣自楚來者舟抵鎮遠卽止明郭子章撫黔開諸葛洞以通之今可至施康矣由施康陸路經華嚴洞相見坡文德關至鎮遠府七十里此則所謂中道也西路由霑益州九十里至來遠鋪八十里宣威州七十里舊堡子六十五里可渡橋爲滇黔分界七十里威甯州威甯鎮貴西道俱駐此六十五里至渾水塘五十五里齊家灣五十里平山哈六十里新屯六十里長春鋪屬畢節縣爲衡州張太守所居一門四詞林五進士一解元簪纓之盛甲於黔省六十里至毛溪廠七十里孫家鋪五十五里白崖六十里大官站爲黔蜀分界舊名判官腦福文襄入滇時改今名五十里牟尼鋪四十五里普市積陰淫雨稀見天日六十里永甯廳有兩城廳與縣夾河分治黔鉛滇銅俱聚於此陸由江門四站至瀘州若登舟約三日可達納谿縣東道亦出滇垣南門七十里七店五十里宜良縣七十五里紅坡七十里大麥地八十里彌勒縣七十里竹園村七十里大江邊八十里新店子七十里架衣八十里芹菜塘九十里阿雞七十里阿記得七十里土庫房五十五里至廣

南府七十里沙木橋七十里西洋江四十里羅貢七十里霽水七十里土宿州四十里四亭七十里歸朝七十里者桑六十里剡隘爲滇粵分界四十里羅村塘九十里至百色自百色舟行經土田州土果化州至南甯府隆安縣宣化永清縣橫州貴縣桂平平南藤縣蒼梧昭平平樂陽朔至廣西省經靈川興安全州至湖南永州府經東安零陵祁陽至衡州府經清泉衡山湘潭至湖南省城長沙府三路之大略如此至若建昌路越西間路亦往來無礙大一統之規不卽此可見哉

滇中地輿一山兩水盡之矣欲知山之支派當察水之源流水流北則山脊向南水流南則山脊在北尋水則山見矣今考滇南之山當以麗江劍川之老君山爲鼻祖相傳其來脈肇自葱嶺其詳不可究問至麗劍之西則特結老君山崔嵬磅礴直入雲表高數十百里有仙蹟龍池蒼鹿白鶴佳木葱鬱異草芬馨人不能陟其顛以窮其奧秋夏之交繁燕羣集於峭壁巉巖內以數萬計相傳老君西出函關係棲真於此山以是得名焉其中支逶迤東向爲鶴之西山劍之東山延袤至觀音山一支西向爲浪之標山至鳳羽爲羅坪側首東南結構蒼洱水潯水交合界斷其脈止矣舊有遊滇者論滇中山水謂點蒼爲鼻祖諸山皆發源於此彼蓋不深究也又有謂由天生橋渡脈於蒙斯言益妄天生橋片石也原無根紆詎得謂脈從此度乎中嶺則自觀音山至佛光寨綿延於浪穹鄧川通海趙州之左至定西嶺分一支於西爲蒙化其東至定邊西界止其西至綿互環衍由南而東爲無量山直奔景東隨瀾滄江派衍爲南夷諸山而莫窮所止大約竟趨南海也由是西嶺之東則爲白崖雲南縣之北山至大波郎轉安南關至普洲則爲沙橋呂合楚雄之南山又東至廣通舍資則北轉爲祿豐祿脰草草鋪一派之北山而姚安武定則北山之支也其南一支出新興由河西通海至臨安元江一帶以遞交趾而至於海東一支則至潞江北轉爲蛇山南向而結省城下曲轉出東川以瀝貴州由是而東北下則之楚之越之吳由是而正南下則

之粵之閩可推而定也古人稱滇爲兩池蓋謂其山脊透迤或轉而南或折而北也今老君山之北流爲金沙江山脊以北之水若鶴慶賓川楚雄姚安武定所屬之水皆歸之無越山而南流者老君山之南流爲瀾滄江若劍川浪穹鄧川雲龍趙州雲南縣蒙化景東祿豐臨安元江所屬之水皆歸之無越山而北流者謂滇山發源於老君山兩水夾流直送中國夫固有條不紊燦若列眉者今山水具在可按而稽焉梁雍皆以黑水爲界諸家考證互異鄺道元謂其出張掖雞山南至燉煌過三危山入於南海樊綽謂其爲麗水程氏謂其爲西洱河蔡傳主之李元陽謂其爲瀾滄江張機謂其爲大金沙江按張掖河出祁連山流至甘州城西與弱水合名曰黑水南至肅州鎮夷堡遶合黎山麓北匯於居延海流入沙漠是爲雍州極北境滇爲梁州極南境中間祁連山縣互千餘里山南瀆水湟水自西而東二水之南爲黃河走東北而二水入之黃河之南有洮河亦走東北入河又南積石山河州二十四關悉崑崙之脊而秦嶺之岡也高大蜿蜒東西且數萬里岡脊以北之水曰河以南曰江一行所謂兩戒也黑水出張掖豈能飛越而南即使洮流亦不能洄數千里復出入海禹貢黑水西河惟雍州言黑水雍州西界也其於導雍水也但云弱水不言黑水者何弱水與張掖河兩源也至甘州匯爲一河曰黑水言弱水卽言黑水弱水既西黑水既西也既西不復南矣其於黑水也復言導者何別梁之黑水非雍之弱水也果梁之黑水源出張掖則經文當純言導弱水至於合黎入於流沙經三危踰於河入於南海矣旣言導弱水復言導黑水是二水也其言餘波者何餘波卽下流也入於流沙非入於南海也然則雍入流沙之黑水非梁入南海之黑水明矣麗水今北金沙江也出吐蕃黎牛石下經麗江府循姚州府武定達馬湖入江不入南海洱河發源罷谷山流經浪穹合蒲陀江至大理府匯爲西洱河卽葉榆水也遶府西南穿石穴出點蒼山後至蒙化界漾濞江入於瀾滄江瀾滄源出吐蕃麗石山下入滇境首過蘭州故曰瀾滄由麗江府永昌蒙化順

甯景東元江達車里入於南海梁州境內別無水入南海入南海者惟潞江與瀾滄而潞源既近不足括梁境元陽專指瀾滄爲黑水近似惜未辨其源不出於張掖也張機謂瀾滄非黑水以其有南金沙江也謂源出吐蕃近大宛國流至騰越外之鐵壁關廣十有五里名大金沙江澄若重溟黝然深碧夏秋漲溢水色莫辨環緬甸太公江頭二城直入南海其見甚卓惜無明徵且亦未免源出張掖之見也愚意瀾滄南金沙二江皆入南海而南金沙源廣流長大於瀾滄數倍其爲黑水無疑昔永明王走緬己亥二月朔渡大金沙江人言卽古黑水是一證也特不可謂源出張掖耳或疑三危山在雍州西境與南金沙江何涉然必謂三危山在雍州西境又與南海何涉自吐蕃距緬崇山不可紀極三危山或逸其名亦未可知今大理雲龍州三崇山壁立萬仞舊志曰古三危山也謂必在雍州西境邪鄭氏曉曰韓苑洛言雍梁二州是兩黑水也不相通觀此知源出張掖合弱水爲雍之黑水則知源近大宛流入緬甸爲梁之黑水矣不然雍州之平涼甯夏俱有黑水蜀之疊溪亦名黑水滇地有黑水祠皆可臆指遷就而聖王畫野分州之大川大絡不復分明豈非禹貢之罪人歟

書傳之言滇池有二一統志云滇池在雲南府城南周廣五百里括地志云在敘州西二十里一名波濤池闊七里風雷一動波浪濤山武帝欲伐昆明以其國有滇池遂於長安鑿池周四十里象之以習水戰按敘州卽漢犍爲郡去雲南府不止二千餘里兩地皆有滇池則漢史所言者彼此未詳不得不起後人聚訟也大抵武帝欲用兵於昆明之滇池因犍爲郡亦有滇池先象之以習戰耳故綱目直書曰昆明有滇池方三百里雖與五百里之言不合已明明不指在敘州言矣或曰武帝欲討者乃犍州之昆明也抑知犍昆明原無三百里之滇池乎且夫昆明之討其顛末有可意度者昔當羌言不遜武克惡之考滇王舊國當在今昆明地年月日又甚相近作池習戰或爲當羌之故歟

近華浦去會城四五里在滇池濱一名草海煙水空濛遠山環拱頗有江鄉風景傍隄建樓名曰大觀其楹聯計一百八十字昆明布衣孫髯翁作

大金沙江發源崑崙山西北吐蕃地卽夏禹所導黑水也雖與雲南小金沙江及瀾滄潞江皆發源吐蕃然金沙江之源較三江最荒遠且其源於三江源邈不相近其下流亦十倍小金沙江及瀾滄二江之水按禹貢華陽黑水惟梁州黑水西河惟雍州周文安辯疑錄云甘肅志甘州之西十里有黑水流入居延海肅州之西北有黑水東流荒遠莫窮所之是其源入雍州之西流入梁州之西南其正西別流遠西極之外而無所據見地勢西北最高故能經西而西南也雲南志載金沙江出西番流至緬甸其廣五里徑趨南海謂非黑水源出張掖流入南海者乎源在中州西南直四川馬湖蠻邦之正西三千餘里雲南麗江宣撫司之西北一千五百餘里愚觀黃河源近雲南地則大金沙江源自番雍之地南入緬海論雍梁間水惟此大耳此水爲黑水無足辯矣朱子云天下有三大水曰黃河曰長江曰鴨綠江此語無足怪也宋初斧畫雲南南渡又偏安一隅朱子又從何知有此江之長廣於江河哉黃真元又云考大金沙江瀾滄三水雖皆入南海大小遠近迥不同瀾僅瀾四分之一大金沙三倍於瀾瀾所出地名在鹿石山在雍望俱可窮源上流亦狹大金沙江之源則遠出番域上流已闊澄若重溟黝然深碧夏秋漲溢江色不變若比於揚子滄浪一小溪卽詩語大金沙江之長廣又可知矣其注云旁多松有琥珀自孟養地來孟養在金沙江之旁今瀾滄不聞有琥珀大理志指瀾滄爲黑水亦不深考耳相傳大金沙江上源近大宛國自里麻茶山至孟養極北不聞有所往號赤髮野人境峭壁不可梯繩弱水不任舟楫土人惟遠見川外隱隱有人馬形似殆西羌之域也今姑略其源惟自其經流支流入海可見者言之水流至孟養陸阻地有大水自西北來一名大居江又云大車江一名檳榔江二水至此合流又名大盈江今騰越州人

總甸內諸水亦曰大盈江殆竊移其名也江流至此夷人方名其爲金沙江江中產綠玉黃金細子金精
石墨玉水晶間出白玉濱江山下出琥珀舊志以琥珀綠玉出在瀾滄江者謬矣昔年王靖遠將定西追
麓川叛賊思機發思卜發兄弟造船飛渡孟養後又與思緣盟誓江乾石爛乃許其過江者皆此江也漢
人相傳名大金沙江若以別麗江北勝武定馬湖之小金沙江耳自此南流經宜猛莫噉莫郎至猛掌有
一江西來入大金沙江又南下昔朴怕鮐猛莫外經蠻莫有一江源自騰越大盈經鎮夷南甸千崖受盡
西茶山古勇諸水伏流南牙山麓出經蠻莫入大金沙江又經蠻法魯勒猛拱遮龍官屯大菖蒲山峽小
菖蒲山峽課馬孟養怕崩山峽戶董鬼哭山戛撒昔年緬人攻孟養以船運兵餉到戛撒爲孟養所敗者
此江也正統中蔡雄帥兵追思機發爲緬人所壓殺於江中亦此江也大約江自蠻莫以上山盤水陡正
統中郭登自貢章順流不十日至緬甸者亦此江也下流經溫板有一江源自騰越龍川江經界尾高黎
共山隴川猛乃猛密所部莫勒江至太公城江頭城入於金沙江下流又經猛吉準古溫板又名溫板江
又名流沙河相傳唐僧取經過此渡故名皆金沙江也猛戛馬噉喇至江頭城中有大山極秀聳山上有
大寺又有一江源自猛辦洗母戛南來入大金沙江又經止郎龍大馬革底馬撒躋馬入南海其江至蠻
莫以下地勢平衍江闊可十五餘里舊志云五里非也經南江益廣流益慢緬人善舟又善泅水操櫓楫
者如涉平地至是江海之水灘爲一色矣文選載佛經云拔提河一名金沙池脫履金沙云云金沙江亦
名拔提河矣今再附考蒙化府志瀾滄江與漾江潯江蒙人謂之大小二江合西洱河勝備河至順蒙交
界處土人謂之羅擦聚日出水光蕩射可觀不二十餘日至錦龍江卽水下流海多客船會易於此漸漸
至南海永昌府志潞江一名怒江水經注云瀾江今訛爲潞江源出吐蕃流經芒市至木邦地名喳哩江
又流經八百車里地至擺古東入南海自木邦以來卽可通舟楫昔年隴川多士甯前往擺古見莽瑞體
小方壺齋輿記也養沙

由此江順流而下也舊傳潞江流至洪門車里沙磧浸散與近騰越志以爲入大金沙江皆非是愚嘗謂三江皆可舟可航夷人欲據險隱塞不使通行豈知天地設此三江正爲○本朝制馭西南緬甸諸夷設當事者誠不可忽而不講也異日有○○聖天子問緬甸諸夷久不朝貢之罪則此三江者固漢家樓船下番禺奇制粵之牂牁江也

牂牁江廣數里深不可測由番禺入南海濱江通粵者惟阿迷州盤江西受石屏建水諸水北受霑益宜良潞江通海河西新興陸涼諸水匯於巡檢司厥流甚巨從此下羅平經廣西泗城州達番禺入南海今羅平江口有牂牁古渡是時道不通黔山多木石險峻複列躋必不能入惟循水道乃可上溯躋歷沅江水盡從他水道得牂牁江遂逆水而上至於夜郎地平衍乃舍舟登岸步行以戰故羅平有古渡蹟其遺事也牂牁舟之至小者軍中載以循水江因舟名非故名也而輿地無牂牁江臨安志首載牂牁亦不知爲何水夫山水之小者歷久可變大水如牂牁豈亦可滅乎余考盤江水入粵寬深與史所稱合遂斷以此爲牂牁初不顧人之信與否也

八達江源出舊霑益花山洞經霑益州東北會盤溪臘溪二水交合南流至曲靖府之橋頭再流而爲陸涼州之湖裏經陸涼南流折而西北爲宜良之大池江再東南流而爲阿迷州之盤江合彌勒縣之巴甸江又爲廣西州之盤江經飛土坡再東北流而爲師宗縣之渾水江六慶拐村可渡稍東流而爲魯克之便柳可渡方水落時只五六十步耳水勢湍急截流乃濟夷人剡木爲舟如魚腹然狹而長僅容兩三人河流再折而東南合羅平州之喜舊溪又合清水江入粵西之西林縣達於右江此河之在師宗境者幾百餘里而夷人遂在江內江外之分清水江源出邱北舊城之龍潭東流近處溉田數百頃夏秋則漲倍之東流入粵西界

永平縣於九十月間天初明有霧自馬街河石洞中出宛若游龍沿銀龍江汴流上至靈化山麓即東折而下須臾布滿城市江村俱在宵霧中已午始散有即晴霽無則多雨土人以此卜陰晴

夏月大理人自蒼山頂負雪來雜以糖蜜水賣之居人爭買以解熱渴雲南會城自明初拓擴爲九里餘遂包三山在內然螺山東北麓猶在城外隍中也其石色黑而玲瓏礫石頗不蠢惡旁居數十家爲小莊蓋其地在小東門外每年二月二日遊人雜沓邀牀遍設於碧無綠樹間絲竹管絃悠然盈耳似亦修禊之遺而獨無湔裙之女時有諸童子以瓦礫承筐而至遊者買之遙擲於石鼓中之則欣然而喜謂宜子之兆云竟日而罷是爲小莊節

火把節卽星回節六月二十五日農民持炬照耀田間以祈年通省皆然其說有三一武侯征南於是日擒孟獲侵夜入城城中父老設庭燎以迎之一曼阿奴之妻阿南時阿奴爲漢將郭某所殺欲妻之阿南恐逼已給之曰妾欲從君君能從我三事乎曰從曰一須作幕次焚故夫二須焚故夫衣三須令國人徧知禮嫁明日如其言聚國人張松幕置火其下阿南抽刀出令火熾盛乃焚夫衣告曰妾忍以身事仇乎遂身躍火中以刀自斷時六月二十五日也國人哀之歲以是日焚炬聚會以弔之一鄧賧詔慈善開元中南詔於星回節召五詔燕會慈善逆知其謀止夫毋往夫不可乃作鐵釧約其臂而去旣而南詔果焚五詔伴以醉失火焚死告各詔骸骨無從辨認獨慈善輿尸而去南詔聞其哲欲娶之慈善閉城自固發兵圍之三日食盡乃盛衣裝西向自縛於座竟以餓死臨卒曰吾往訴夫冤於上帝矣南詔聞之悔曰誤逼此貞婦乃旌其城曰德源城三說均有所本今則農人卜豐年相率歡宴而已

雲南風尚班固云自滇以北皆椎髻耕田有邑聚西自桐師以東北至樸榆編髮隨畜移徙無常處范曄云有鹽池田漁之饒金銀畜產之富人俗豪汰居官者皆富及累世唐書云男女勇捷不鞍而騎四時大

底與中國無差犁田以一牛三夫前挽中壓後驅然專於農無貴賤皆耕圖經云漢夷雜處田地肥磽相半民氣和柔天時無劇寒甚暑按班范所云皆蒙昧初開時事今則室廬安處無隨畜移徙之俗而貧戶望衡率從纖嗇舊時官族飢窘堪憐又焉得而有累世之富乎惟圖經數語則古今如一未嘗變也至於士女好遊與蜀相同而各節宴會約略荆吳其婚喪等事漢人亦頗得中或反有過厚過奢處然較之維揚燕薊諸方俗開喪炒親之惡習撒網爭聘之濫風固無之也惟嫁女而死者要回匭賸厥居而產者出就便房是非厚道大替古風所宜速化二者爲先

土性有橫土直土之異橫土載水點滴不漏卽取作土屋可居百年直土則一望赤地而已考周禮草人掌土化之法以物地相其宜而爲之種鄭注土化之法化之使善也其用在糞辟剛用牛赤緹用羊墳壤用麋渴澤用鹿鹹瀉用狙勃壤用狐埴壚用豕輕壤用犬今旣不能分晰土性亦無麋鹿狙狐之矢可用每遇直土卽棄之不顧然亦可種果樹木以爲百年之計而勤者苦牛羊之踐踏惰者歎地力之薄磽瘠哉

周禮三農鄭氏云山農澤農平地農也天下土田形勢各各不同則禾苗菽麥所栽亦異秧馬不上山柞氏不下水地利與農事相因也惟雲南悉備三農跬步皆山雖少平地然綠水青疇雷鳴雨集秋可以不而春可以麥者卽平地農矣若芟柞焚燒其草木而強犂大鏵治爲畝略種杞栽蕎抑或有泉可引之處則剝木規於懸崖削壁鑿梯田於疊巘層嵐亦種秋禾或栽旱穀是皆山農之謂也至於藝草留沙溝渠圍埂長刀割裂小艇蒙牽水潯崖角停泊滯沿動經數載漸可施功當其栽插則龍尾車聲滿林皋及夫收割則諸葛鏹欄橫秋水諺所謂厚水栽私撐船割穀者此可不謂之澤農乎

滇地山多田少土人依山麓平曠處開作出園層層相間遠望如畫至山勢峻極臨坎而登有若梯磴各

曰梯田水源高者通以略約數里不絕至高亢處待雨播種曰雷鳴田亦曰靠天田

晉甯州白龍廟前有一石出土周圍有五六尺人有坐履其上者必罹疾掘之根大不能起或云其下有符章制蛟至今人猶禁之

昔有一人牧牛於晉甯海邊牛夜入水戀草忽雞鳴盡化爲石今石在水儼若牛形因以名鄉

祿豐西隅有兩山並時中通眾流元時有二石牛一北入黑龍潭一西入河每年雨水漲兩地輒有牛逐水浮沈土人彷彿見之至今猶然

文筆峰在安甯州東五里正對明倫堂大門甍甍聳狀若浮屠合尖時先輩以五經遙擲其內惟納葩經至今州士科甲得遇者多詩經卷也

接天石在安甯高山前怪石嵯峨形如獅象層駕疊峙高逼雲端莫敢仰視真異境也

安甯州北虎邱山一幹皆土有石昂出如虎頭其石深不可測上有梵字石碑鎮之

大理石屏有山川雲樹之狀唐李德裕以爲醒酒石

大理城南三十里洱河下趨處俗傳爲大士所鑿以洩洱水絕壑深塹石梁跨之憑虛凌空可度一人故名天橋橋西百武層石當流水激浪飛珠如梅綻因呼爲不謝梅橋北有沓嶂又名一綫天水故道也石林古色可吹洞簫

雲南縣西南十五里珍珠泉峰有洞昔人入洞得花鮮豔異常出視之石也遂不敢入因名其洞曰石花

古洞

相傳諸葛武侯行軍軍士以湯團用餉傾其餘者成石擊破之內黃外白名湯團石徵士曹晨曰此禹餘糧也因武侯行軍而成更名武餘糧可入藥